

四庫全書

集部

欽定四庫全書

集部

淮海集

目錄
卷一至

詳校官庶吉士臣汪彥博

侍讀臣孫球覆勘

覆校官中書臣田尹衡

校對官中書臣袁文邵

謄錄監生臣劉國永

欽定四庫全書

集部三

淮海集目錄

別集類二宋

卷一

賦

卷二

古詩一

卷三

古詩二

卷四

古詩三

卷五

古詩四

卷六

古詩五

卷七

律詩一

卷八

律詩二

卷九

律詩三

卷十

絕句上

卷十一

絕句下

卷十二

進策一

卷十三

進策二

卷十四

進策三

卷十五

進策四

卷十六

進策五

卷十七

進策六

卷十八

進策七

卷十九

進論一

卷二十

進論二

卷二十一

進論三

卷二十二

進論四

卷二十三

論

卷二十四

傳

卷二十五

傳說

卷二十六

表上

卷二十七

表下

卷二十八

啓上

卷二十九

啓下

卷三十

簡

卷三十一

文工

卷三十二

文下

疏

卷三十三

誌銘

卷三十四

贊

跋上

卷三十五

跋下

卷三十六

狀

卷三十七

書

卷三十八

記

卷三十九

序

卷四十

挽詞

後集

卷一

詩一

卷二

詩二

卷三

詩三

卷四

詩四

卷五

雜文上

卷六

雜文下

長短句

卷上

二十二首

卷中

三十一首

卷下

二十三首

臣等謹案淮海集四十卷後集六卷長短句
三卷宋秦觀撰觀字少游高郵人以秘書省
正字通判杭州坐黨籍遠貶載宋史文苑傳
觀與兩弟覲觀皆知名于時而觀集獨傳宋
史本傳稱文麗而思深苔溪漁隱叢話載蘇
軾薦觀于王安石安石答書述葉致遠之言
以為清新婉麗有似鮑謝教陶孫詩評則謂
其詩如時女步春終復婉弱元好問論詩絕

句因有女郎詩之譏今觀其集少年所作神
鋒太儁或有之槩以為靡曼之音則詆之太
甚呂本中童蒙訓曰少游雨砌墮危芳風櫺
納飛絮之類李公擇以為謝家兄弟不能過
也遊嶺以後詩高古嚴重自成一家與舊作
不同斯公論矣觀雷州詩八首後人誤編之
東坡集中不能辨則安得槩目以小石調乎
文獻通考別集類載淮海集三十卷又歌詞

類載淮海集一卷宋史則作四十卷今本卷
數與宋史相同而多後集六卷長短句分為
三卷蓋嘉靖中高郵張紘以黃瓚本及監本
重為編次云乾隆四十一年十月恭校上

總纂官_臣紀昀_臣陸錫熊_臣孫士毅

總校官_臣陸費墀

欽定四庫全書

淮海集卷一

宋 秦觀 撰

浮山堰賦

并引

梁武帝天監十三年用魏降人王足計欲以淮水灌壽陽乃假太子右衛康絢節督卒二十萬作浮山堰於鍾離而淮流湍駛漂疾將谷復潰或曰淮有蛟龍喜乘風雨壞岸其性惡鐵絢以為然乃引東西冶鐵器數千萬斤益以薪石沉之猶踰年乃合堰袤九里水逆淮而上

所蒙被甚廣魏人患之果徙壽陽戍頓八公山餘民分就岡壠未幾淮暴漲堰壞奔于海有聲如雷水之怪祆蔽流而下死者數十萬人初鎮星犯天江而堰實退舍而壞嗚呼異哉感而作浮山堰賦其詞曰

繫四瀆之並醜兮實脉絡於坤靈惟長淮之漫漫兮自桐栢而發源貫江河以下驚兮拉泗沂而左奔走獐雷以赴海兮駕扶搖而薄山固元氣之宣節兮熄衆兆之災患粵蕭梁之服命兮抗北魏以爭衡信降虜之詭計

兮阻湯湯而倒征依兩崖以受土兮羌合眷於中央捷
竹留石之不足兮又沈鐵以厭不祥袞九里以中峙兮
截萬派之奔茫大隄屹乎如墉兮杞柳薨其成行展源
深而支永兮雖蹇否而必通條鯨吼以奔潰兮與蒼蒼
而俱東若燃犀之照渚兮旅百怪而爭遁驛馬怒而噓
蹠兮虎蛟咆而相糾哀死者之數萬兮孤魂逝其焉游
背自然以司鑿兮固神禹之所惡世苟近以昧遠兮或
不改其此度螳螂怒臂以當車兮精衛銜石而填海惜

梁人之不思兮卒取非於異代豈方迫於尋引兮不遑
議夫無窮將姦臣取容以幸入兮公相援而欺蒙抑五
材因壯之有數兮特假手於憧憧系曰敦阜寇冥大川
屯精氣扶輿變乾文運徒力頓漂無根潮波復故彌億
年

黃樓賦

并引

太守蘇公守彭城之明年既治河決之變民以更生又
因修繕其城作黃樓於東門之上以為水受制於土而

土之色黃故取名焉樓成使其客高郵秦觀賦之其詞
曰惟黃樓之瓌瑋兮冠雉堞之左方挾光晷以橫出兮
干雲氣而上征既要眇以有度兮又洞達而無旁斥丹
艫而不御兮爰取法乎中央列千山而環峙兮交二水
而旁奔岡陵奮其攫拏兮豁谷效其吐吞覽形勢之四
塞兮識諸雄之所存意天作以遺公兮慰平日之憂勤
繫大河之初決兮狂流漫而稽天御扶搖以東下兮紛
萬馬而爭前象罔出而侮人兮螭蜃過而垂涎微精誠

之所貫兮幾孤墉之不全偷朝夕以昧遠兮固前識之
所羞慮異日之或然兮復壓之以茲樓時不可以驟得
兮姑從容而浮遊儻登臨之信美兮又何必乎故邱觴
酒醪以為壽兮旅殽核以為儀儼雲鬢以侍側兮笑言
樂而忘時發哀彈與豪吹兮飛鳥起而參差悵所思之
遲暮兮綴明月而成詞噫變故之相詭兮猶傳馬之更
馳昔何負而遑遽兮今何暇而遨嬉豈造物之莫詔兮
惟元元之自貽將苦逸之有數兮疇工拙之能為韙哲

人之知其故兮蹈夷險而皆宜視蚊虻之過前兮曾不
介乎心思正余冠之崔嵬兮服余佩之焜煌從公於斯
樓兮聊裴回以徜徉子瞻謝詩云太虛以黃樓賦見
寄作詩為謝我坐黃樓上欲作黃
樓詩忽得故人書中有黃樓詞黃樓高十丈下建五丈
旗楚山以為城泗水以為池我詩無傑句萬景驕莫隨
夫子獨何妙雨電散雷推雄辭雜今古中有屈宋姿南
山多磬石清滑如流脂朱蠟為摹刻細妙分毫釐佳處
未易識當有來者知

寄老庵賦

或問孫先生之遊湯泉山也嘗於佛祠之旁二松之下

誅薙草茅平夷土塗規以為庵曰寄老焉予時實從與
見其事願揚摧而陳之僕曰唯唯寄老之區在於湯泉
實惟歷陽東城之域山林鬱其修阻水土婉而滋息風
和氣平物無癘疫其出遊也南則峰巒經亘二百餘里
前望建業之都却顧項王之亭龍窟呀其旁出江漫漫
而徂征東則惠濟真相二刹相望殿寢中開四注脩廊
間從遊子於焉相羊沈燎茗飲樂未渠央西則楮落之
前三井天出幽巖白浪明晦如一旁輸有斛上庇有室

解衣入遊百疾為失北則瓦梁之河陰陵之澤水潦之所聚會魚鼈之所充斥芟菱蒲蓴毛髮之富被其鄰國其入居也則閉關却掃反聽收視內外既進與妙自會湛乎若玉淵之澄枵然如槁木之廢其遊也其居也無所適而非道者世奚足以識之哉雖然先生方為侍從之臣充諫諍之官論思獻納日不遑給雖欲復從二三子於寄老之上未可得也一旦功成事畢引老乞身天子憫之不煩以政公卿大夫設祖道供帳於國門之外

酒闌升車望寄老而歸焉則僕也亦將負杖屨而從之
矣

湯泉賦

大江之濱東城之野有泉出焉直回峰負深谷分埒引
源迤邐相屬晨夜有聲涵雲注玉薄為虎鬚狀為魚目
鱗介莫潛遇者斯浴此何水也哉野老告余曰泓泓洧
洧莫虞歲年不火而燠其名湯泉嗚呼豈非熒惑莅於
上耶燭龍隱於中耶旁通咸池日御之所經耶幽精沈

魄陰償其負耶丹砂黃硫金石之氣酷悍之所激耶德
有常仁惠公而決寒凝海兮不冰旱焦山兮不竭其或
燥濕外干精氣散越膚革瘡瘍憊筋淫血欣澀汨之蹇
游恍幽憂之永脫以沐則髮澤以類則膚悅其羨流冗
浸捐棄於溝壑者猶能灌蔬稻之畦已牛馬之暍此又
何其然耶吾聞天下之水厥類實繁至於弱水儲陰投
羽必沈火井萃陽爛石灼金祥標醴泉病飲而瘳異紀
滋穴神瀆以流焦溪乏胃蔓之飾沸潭謝聲取之游其

餘酒墨所發膠鹽是滋啜懷千金飲狂一國哀玉乳以
中涵橫金絲而徑度詭品繆名紛莫為數咸受命於元
精亦各私其所遇若夫匡廬汝水之旁尉氏驪山之下
烟菲掩褥王孫鳥隼之所娛金穴椒房專寵靡曼之所
占則湯泉之中又有顯晦者焉野老羶然而笑曰善乎
齊給之士曳杖而去行歌於塗曰澤沸滂沱奮此泉兮
被彼山阿吾唯灌沐兮不知其他

子瞻跋云余之所聞湯泉七其五則今三子之所遊

與太虛之所賦所謂匡廬汝水尉氏驪山其二則余之所見鳳翔之駱谷與渝州之陳氏山居也皆棄於窮山之中山僧野人之所浴麋鹿猿獠之所飲惟驪山當往來之衝華堂玉甃獨為勝絕然坐明皇之累為楊李祿山所汙使口舌之士援筆唾罵以為亡國之餘辱孰甚焉今惠濟之泉獨為三子者詠嘆如此豈非所寄僻遠不為當塗者所溷而為高人逸才與世異趣者之所樂乎或曰明皇之累楊李祿山之汙

泉豈知汙之然則幽遠僻陋之歎亦非泉所病也泉固無所榮辱特以人意推之可以為抱器適用而不擇所處者之戒元豐元年十月五日

歎二鶴賦

廣陵郡宅之園有二鶴焉昂然如人處乎幽間翹翮摧傷而弗能飛翻雖雌雄之相從常悒悒其鮮懽時引吭而哀唳若對客而永嘆圃吏告予曰此紫薇錢公之鶴也公熙寧時實守此邦心虛一而體道治清淨而忘言

既不耽乎豆觴又不嗜乎匏絃惟此二鶴與之周旋居
則俛仰於賓掾之後出則飛鳴乎導從之先故鶴之來
也則知使君之將至鶴之往也則知使君之將還是時
一郡之人好甚於姻敬愈於客如愛子之居家若寵臣
之在國晝從乎風亭之濱夜棲乎月臺之側謂此幸之
可常頗超搖而自得逮公之去于今幾時人各有好鶴
誰汝私具名物於有司雞鶩易而侮之傍軒楹而蒙叱
歷階祀而遭麾惟主人之故客間一遇而嗟咨余聞而

嘆曰噫嘻有恃而生者失其所恃則悲彼有啄乎廣莫之野飲于清冷之淵隨林邱而止息順風氣而騰騫一鳴九臯聲聞于天若然者又豈衛侯之能好而支遁之可憐哉

郭子儀單騎見虜賦

汾陽征虜
壓以至誠

回紇入寇汾陽出征何單騎以見虜蓋臨戎而示情匹馬雄趨方傳呼而免胄諸羌駭矚俄下拜以投兵方其唐祚中微胡塵內侮承范陽猖獗之亂值永泰因循之

主金縢不足以塞其貪嗜鎧仗不足以止其攘取雲屯
三輔但分諸將之兵烏合萬群難破重圍之虜子儀乃
外弛嚴備中輸至誠氣干霄而直上身按轡以徐行於
是露刃者膽喪控弦者骨驚謂令公尚臨於金甲想可
汗未厭於褰瀛頓釋前憾來尋舊盟彼何人斯忽去幢
幡之盛果吾父也敢論戈甲之精豈非事方急則宜有
異謀軍既孤則難拘常法遭彼虜之悍勁屬我師之困
乏校之力則理必敗露示以誠則意當親狎所以徹衛

四環去兵兩夾雖鋒無鏑邪之銳而勢有泰山之壓據
鞍以出若乘擒虎之驄失仗而驚如棄華元之甲金石
至堅也以誠可動天地至大也以誠可聞矧爾熊羆之
屬困乎蛇豕之羣於是時也將乘驕而必敗兵不戢而
將焚惟有明信乃成茂勲吐蕃由是而引歸師殲靈夏
僕固於焉而暴卒禍息并汾非不知猛虎無助也受侮
於狐狸神龍失水也見侵於螻蟻曷為鋒鏑之交下遽
遺紀綱而不以蓋念至威無恃於張皇大智不資於恢

詭遠同光武輕行銅馬之營近類曹成獨造國良之壘
向若怨結不解禍連未央養威嚴於將軍之幕角技巧
於勇士之場攻且攻兮天變色戰復戰兮星動芒如此
則雖驍雄而必弊顧創病以何長符秦夸南伐之師坐
投肥水新室恃北來之衆立潰昆陽固知精擊刺者非
為將之良敢殺伐者非用兵之至况德善之身積宜福
祥之天畀故中書二十四考焉由此而致

和淵明歸去來辭

歸去來兮眷眷懷歸今得歸念我生之多艱心知免而
猶悲天風飄兮余迎海月烟兮余追省已空之憂患疑
是夢而復非及我家於中途兒女欣而牽衣望松楸而
長慟悲心極而更微升沈幾何歲月如奔嗟我宿昔通
籍璧門賜金雖盡給札尚存愧此散木繆為犧尊屬黨
論之云興雷霆發乎威顏淮南謫於天庖予小子其何
安歲七官而五譴越鬼門之幽關化猿鶴之有日詎國
光之復觀忽大明之生東釋纍囚而北還醜天漢而一

洗覺宇宙之隨寬歸去來兮請逍遙於至游內取足於
一身復從物兮何求榮莫榮於不辱樂莫樂於無憂鄉
人告予以有年黍稷鬱乎盈疇止有敝廬泛有扁舟濯
予足兮寒泉振予衣兮古丘洞骨中之滯礙眇雲散而
風流識此行之匪禍乃造物之餘休已矣哉桔槔俛仰
無已時舉觴自屬聊淹留汝今不已將安之封侯已絕
念仙事亦難期依先塋而灑掃從稚子而耘耔脩杜康
之廢祠補由庚之亡詩為太平之幸老幅巾待盡更奚

疑

淮海集卷一

欽定四庫全書

淮海集卷二

古詩

宋 秦觀 撰

泊吳興西觀音院

金刹負城闌，閭然美栖止。
卞山直穹窿，茗水相依霜。
檣鬱冥冥海，棕鮮嶷嶷廣。
除庇夏陰飛，棟明朝晷溪。
光鳬鶩邊天，色孤蒲裏緒。
風傳畫焚壁，月窺夜禮洩。
雲羣層空規，荷鑑幽汜舳。
艫烟際下鍾磬，林端起聲牙。
戲清深嶽崙，撲空紫所遇。
信悠然此生如，寄耳志士耻溝瀆。

征夫念桑梓攬衣軒楹間嘯歌何窮已

三老堂

趙少師張少保趙通議

堂堂三元老業履冠儔匹謇諤橫秋霜高明麗朝日竝
道謁溫宣連科取甲乙東南奠藩服西北馳使驛解鞅
環堵安岸幘羶裘屈羣姦懾謦欬衆廢起咄叱至今領
麾地謳吟遍蓬華出入雖異途歸潔固如一晚厭方內
遊把袂訪閑逸雲壑慶安車風川駛飛鷁獻酬埃壒外
珠玉在揮筆風標傲松鶴顏髮移丹漆遂令吳越人藻

繪恣稱述邈然超世姿髣髴得十七辟靡禮寂滅麟閣
事蕭瑟茲焉出民願名實更炳蔚琬琰高詞龍蘭燎
深室福履既所綏光華無終畢

送周裕之赴新息令

丈人淮海英抗節浮雲外揮毫錯星錦抵掌參竿籟青
春抱脩能脫略無范蔡晚營三徑資百里聊束帶扁舟
歲欲徂古刹夜仍艾去去整羽儀行與高風會

寄曾逢原

孟夏氣候好林塘媚晴輝回渠轉清流藻荇相因依叢
薄起踈籟衆鳥鳴且飛高城帶落日光景酣夕霏即事
遠興託撫已幽思微超搖弄柔翰徙倚絃金徽美人邈
雲眇志願固有違丹青儻不逾與子同裳衣

送僧歸遂州

寶師本巴蜀浪跡遊淮海定水湛虛明戒珠烟圓彩飄
零鄉縣異晚晚星霜改明發又西征孤帆破烟靄

司馬遷

分韻得
堅字

子長少不羈發軔遍丘壑晚遭李陵禍憤排思遠託高
辭振幽光直筆誅隱惡馳騁數千載貫穿百家作至今
青簡上文彩炳金甌高才忽小疵難用常情度譬彼海
運鵬豈復顧繒繳區區班叔皮未易議踈略

觀易元吉獐猿圖歌

叅天老木相樛枝嵌空怪石銜青漪兩猿上下一旁掛
兩猿熟視蒼蛙疑蕭蕭叢竹山風吹海棠杜宇相因依
下有兩獐從兩兒花殮草嚙含春嬉易老筆精湖海推

畫意忘形形更期解衣一掃神扶持他日自見猶嗟咨
金錢百萬酒千鷗荆南將軍欣得之老禪豪取索為垂
白晝掩門初許窺房櫳烟烟明冬曦榛藂羽革分毫釐
殘編未終且歸讀歲暮有間重借披

夜坐懷莘老司諫

次韻參寥

六合寥寥信茫昧中有日月無根柢古往今來漫不休
青髮素顏從此逝嗟予自少多遭迴氣血未衰心已艾
北渡長淮霜入屨南窺禹穴塵生袂日鑿一竅渾沌死

雖有餘風終破碎回車復路可無緣三問道人不對

答朱廣微

廣微才華殆天賦十歲孤山有佳句又夢東林飲虎溪
歎息清風人不悟自爾所見無全牛桐栢崑崙日傾注
葱蘢曉景破新花蹭蹬老拳擒脫兔身勤事左竟何成
巧迫化工天所怒兩鬢星星滄海頭強學禪那慰遲暮
昨夜燈花吐金粟曉烹鯉魚得尺素笑我徜徉吳楚間
經卷酒卮隨所遇人生迂意十八九月得解顏能幾度

著書準易空自疲服藥求仙良亦悞北風老矣無能為
行看黃鸝語飛絮安得從君醉百場落筆珠璣不論數

送僧歸保寧

西湖環繞皆招提樓閣晦明如卧披保寧復在最佳處
水光四合無端倪車塵不來馬足斷時有海月相因依
上人弱齡已隸此心目所證惟瑰琦白玉芙蓉出清沼
天然不受緇塵擾坐客一語不入意目如明星視飛鳥
冠切雲兮佩玉難上人顧之真等閑應緣聊入人間世

興盡却歸湖上山伊余久欲窺禹穴矧今仲父官東越
行挽秋風入剡溪為君先醉西湖月

和王通叟琵琶夢

鶻鴂鳴時衆芳歇華堂夢斷音容絕風驚玉露不成圓
一夜芙蓉泣秋月金紋捍面紫檀槽曾抱花前送酒舫
庾郎江令費珠璧小砑紅牋揮兔毫風流雲散令人瘦
忍看麴塵昏錦綬楚水悠悠更不西上天破鑑空依舊

醫者

塊然一氣初渾淪散作六物相吐吞主承客禦勝復存
是為萬物疾病原寥寥空陂遊冤魂誨此法術成軒轅
金書玉冊要不煩煥如星宿不可捫時遷聖祖遂幽昏
弊俗竊以資利源余嘗感槩期明論世無妙質孰與言
因君乞詩置屋軒聊復援筆賦本根

漫郎

分韻得
桃字

元公機鑒天所高中興諸彥非其曹自呼漫郎示真率
日與聲叟為嬉遨是時胡星殞未久關輔擾擾猶弓刀

百里不聞易五穀三士空傳殺二桃心知不得載行事
俛首刻意追風騷字皆華星章對月漏洩元氣煩揮毫
猗玗春深茂花竹九疑日暮吟哀猱紅顏白骨付清醪
一官於我真鴻毛乃知達人妙如水濁清顯晦惟所遭
無時有祿亦可隱何以龕巖遠遁逃

記夢荅劉全美

歲逢困敦斗申指辰次庚辰漏傳子夢出城闌登古原
草木榮天帶流水千夫荷鉶開久殯前有一人狀瓌偉

素冠長跪烝酒穀云是劉郎字全美馬鳴車響斷還續
人鏡晦明秋色裏既寤茫然失所遭河轉星翻汗如洗
世傳凶夢常得吉神物戲人良有旨全美聲名海縣聞
閉久當開乃其理娟娟二十四橋月月下吹蕭聊爾耳
洗眼看君先一鳴九萬扶搖從此始

田居四首

雞號四鄰起結束赴中原戒婦預為黍呼兒隨掩門犁
鋤帶晨景道路更笑喧宿潦濯芒屨野芳簪髻根霽色

披宵靄春空正鮮繁辛夷茂橫阜錦雉嬌空園少壯已
雲趨伶俚尚鷗蹲蟹黃經雨潤野馬從風犇村落次第
集隔塍致寒暄眷言月占好努力競晨昏

入夏桑柘稠陰陰翳虛落新麥已登場餘蠶猶占箔隆
曦破曾陰霽靄收遠壑雌蜺卧淪漪鮮飈泛藂薄林深
鳥更鳴水漫魚知樂羸老厭煩歆解衣屢槃礴蔭樹濯
涼颼起行遺帶索冢婦餉初還丁男耘有託倒筒備青
錢鹽茗恐垂橐明日輸絹租鄰兒入城郭

昔我時青秧廉纖屬梅雨及茲欲成穗已復頽星暑遲
暮易昏晨搖落多砧杵村迥少過從客來旋炊黍興發
即杖藜未嘗先處所褰裳涉淺瀨矯首沒孤羽藜祠土
鼓悲野埭鷗鷄舞雉子隨販夫老翁拜巫女辛勤一作
艱難

稼穡事惻愴田疇語得穀不敢儲催科吏旁午

嚴冬百草枯鄰曲富休暇上井時一汲柴車久停駕寥
寥場圃空跼跼烏鳶下孤榜傍橫塘喧春起旁舍田家
重農隙翁媼相邀迓班坐釃酒醪一行三四謝陶盤奉

旨蓄竹筴羞雞鴈飲酣爭獻酬語闌或悲咤悠悠燈火
暗刺刺風颭射客散靜柴門星蟾耿寒夜

寄題傅欽之草堂

河陽有狀流經營太行根盛德不終晦發為清濟源斯
堂濟源上太行正當門仰視浮雲作俯窺流水犇脩竹
帶藩籬百禽鳴朝暾相望有盤谷李愿故居存主人國
之老實惟商巖孫班行昔供奉亟進逆耳言天子色為
動羣公聲亦吞蕭條冰霜際不改白玉溫出處士所重

其微難具論公勿思草堂朝廷待公尊

次韻酬徐仲車見寄

渭清非勝涇蘭芳木無慕我生季葉中乃與古人遇
職當供洒掃匏繫愧遲暮來章感存沒三讀淚如注

次韻邢敦夫秋懷十首

以微雲淡河漢疎
雨滴梧桐為韻

驅車陟高邱却望大梁圻馳道入雙闕勾陳連太微
夷門壯下屬清洛相因依美哉吾黨士皋高良可希

暮有二客至俱以能禪聞一枝惠林出一派智海分言

各不相可往來劇絲焚謝客姑舍是妨余醉看雲

昔者曾中書門戶實難瞰筆勢如長淮初源可觴濫經
營終入海欲語焉能暫斯人今則亡悲歌風慘愴

渤海有巨鼇其顛冠峩峩宿昔嘗小抃八弦相盪摩忽
遭龍伯人一舉空潮波取皮煎作膠清此崑崙河

蝮蛇初螫手壯士斷其腕豈不悲毀傷所卹在一作存軀幹

西羌沙鹵地置戍或煩漢雞肋不足云阿瞞妙思筭

湯湯辟靡流中有學子居但說若稽古言猶三萬餘來

者轉相祖詞林日凋疎稍喜績溪令入校天祿書

匠氏構明堂百材入斤斧儻非豫章棟冗長亦焉取英

英范與蘇

登守
慶師

器識兼文武胡為先一州不用作霖雨

憬彼高句麗來脩裔夷職天都富如海勞汝送涓滴軸
艚尾相銜遠近困供億止沸當絕薪揚湯百無益

祖宗舉賢良充賦多名儒執事惡言者此科為之無雖
有仲舒錯或橫江潭魚果欲鳴鳳至還當種椅梧

邢侯秋卧病揮毫見深衷賡者二三子翕然笙磬同不

為兒女姿頗形四方風屬有山水念因之絲與桐

淮海集卷二

欽定四庫全書

淮海集卷三

宋 秦觀 撰

春日雜興十首

飄忽星氣徂青陽
迫遲暮鳴飛各有適
赤白紛無數雨
砌墮危芳風軒納飛絮
褰幃香霧橫岸幘雲峰度
林影舞窻扉池光染衣屨
參差花鳥期
蹭蹬琴觴趣
撫事動幽尋
感時遺近慕
秣馬膏余車
行行不周路

結髮謝外好
僂俛希前修
繆挾江海志
耻為升斗謀
齟

欽定四庫全書

淮海集
卷三

歷難刻畫賤貧多鬻尤發軔皆伊闕解驂憇邦溝丹鉉
費永晷翹蘖毆深愁壁月鑒簾櫳珠星絡梧楸泯泯渠
水駛霏霏花霧浮公子悵何許撫膺徒離憂

潭潭故邑井猗猗上宮蘭不食自清潔莫服更幽閒志
士耻弱植卷跡甘饑寒佳晨追良覲觸物懸悲端川途
眇回遠經歲曠音翰豈不慕裘馬詭得非所安蟬冕多
怵迫繩樞尠憂患枉尋竟何補方枘誠獨難

吳會雖徧小海濱富奇峰天雞一號叫劒戟明遙空谿

谷相徑復深林杳攢叢猿吟虎豹啼雲氣迷西東中有
遯世士超然闕孤蹤被蘭服明月起坐松聲中夜鍛吸
沆瀣朝瑟庇青葱騎星友元氣巢許安可同俛眄區中
人飛埃集毛鋒問津或不繆從子游鴻蒙

東方有美人容華茂春榮抱影守單棲含睇理哀彈聲
意一何切所歡邈雲漢徒然事膏沐孰與徂昏旦微誠
浪自持嘉月忽復晏巧轉度虛櫺飛紅觸幽幔歲歲芳
草滋夜夜明星爛合并會有時索居不必歎

欽定四庫全書

淮海集
卷三

寢瘵倦文史駕言從遨嬉颶風舉遙淑規日麗清漪含
桃粲朱實杜若懷碧滋娉娉弱絮墮圍圍文魴馳明霞
廓遠矚哀禽攪離思縟草天際合孤雲川上移寬閑絕
輪鞅重複多路岐信美難久佇歸歟從所治

昔我遊京室交通五陵間主客各英妙袍馬相追攀干
金具飲啜百金雇吹彈纓弁羅廣席當頭舞交竿鮮粧
耀淥酒采纈生風瀾燈燭暗夜艾士女紛相班歡娛易
徂歇轉眄如飛翰疊疊負孤願離離銜永歡山鳥窺茗

飲簷花笑蔬飧棄捐勿重陳事定須蓋棺

客從遠方來遺我昭華管吹之動人心異境生虛窾
礪青嶂橫泱泱春溜漸馬蹄交狹邪車轂錯平坦士女
競芳辰禽魚蔭修竿依微認睇笑淩沒見纖短停吹歛
泯滅耽耽復空館靈物信所珍顧恨知音罕

桃李用事辰鮮明奪雲綺繁華一朝去默默慚杞梓時
徂鷹化鳩地遷橘為枳獨有羨門生後天猶一作常不死

藝籍燔祖龍斯文就淪喪帝矜黔首愚諸雋一作雄出相

望楊馬操宏綱韓柳激頽浪建安妙謳吟風槩亦超放
玉繩帶華月艷艷青冥上奕世希末光經緯得無妄兒
曹獨何事詆斥幾覆醬原心良自誣猥欲私所尚螳螂
拒飛轍精衛填溟漲吐吐徒爾為東海固無恙鵙鸞日
彫滅黃口紛冗長投袂睇層霄茲懷誰與亮

和孫莘老題召伯斗野亭

淮海破冬仲雪霜滋不平菱荷枯折盡積水寒更清輟
棹得佳觀湖天繞朱甍信美無與娛濁醪聊自傾北眺

桑梓國悠然白雲生南望古刊溝滄波帶蕪城村墟翳

茅竹孤烟起晨烹簷間鳥聲落客子念當行攬衣視日

景薄陰漏微明何時復來遊春風發鮮榮

孫莘老倡云
淮海無林邱

曠澤千里平一渠閘防猪物色故不清老僧喜穿築比
戶延朱甍簷楯斗杓落簾幃河漢傾平湖杳無涯湛湛
春波生結纜嗟已晚不見芙蓉城尚想紮芡盤明珠出
新烹平生有微尚一舟聊寄行遇勝輒偃蹇霜鬚刷澄
明可待齒牙豁歸歟謝浮榮黃魯直和云謝公所
築埭未歎曲池平蘇州來賦詩句與秋氣清結構擅空
闊湖光浮棟甍維斗天司南其下百瀆傾貝宮產明月
含澤遍諸生盤薄淮海間風烟浸十城簾簫吹木末浪
波沸庖烹我來抄搖落霜清見魚行白鷗遠飛回得我
若眼明佳人歸何時解衣繞廂榮蘇子瞻和云落

帆謝公渚日脚東西平孤亭得心憩暮景舍餘清坐待
斗與牛錯落掛南甕老僧如宿昔一笑意已傾新詩出
故人舊事疑前生吾生七往來送老海上城逢人輒自
哂得魚不忍烹似聞續溪老復作東都行小詩如秋菊
艷艷霜中明過此感我言長篇發春榮蘇子由和云
扁舟未得解坐待兩闌平濁水汙人思野寺為我清
昔遊有遺詠枯墨存高甕故人獨未來一樽誰與傾北
風吹微雲暮寒依月生前望邗溝路却指鐵甕城茅簷
卜茲地江水供晨烹試問東坡翁畢老僧榮張琬和
不足隱約性愈明早為歸耕計免慙老僧榮張琬和
云維舟得古寺望遠天四平晴日暉暉散晚風冷
清危亭下瞰野層閣高連甕起望斗與牛淮海相奔傾
往來誰百年今昔我平生悠悠何所寓臺上多化城與
其逐影死寧似不鳴烹咄哉應有止老矣將安行中庭
柜子落文室霜月明此意竟蕭條猶然笑安榮張芸
叟和云我登甘棠隸所向殊未平舟行汙地中頓失

江湖清蛙聲亂僧鳴鷓鴣市覺意同伯喈死苟與衛
士傾開池種白蓮壘石擬三生猶淹南斗墟終遠北斗
城設我紫藕供報之白茅烹三年猿鶴友萬里秦楚行
秋風隴首至落日淮南明寄言懷土士慎勿慕官榮

和虛飄飄

虛飄飄虛飄飄風寒飄絮浪春暖履冰橋勢緩霜垂霞
聲乾葉下條雨中漚點沒流水風裏綵雲鋪遠霄虛飄

飄比時光影猶堅牢

魯直倡
到地虹起

虛飄飄虛飄飄花飛不
漫成橋入夢雲千疊遊

空繚萬條蜃樓百尺聳滄海鴈字一行書絳霄虛飄飄

子瞻和

虛飄飄虛飄飄畫簷蛛
比人生命猶堅牢

結網銀漢鵲成橋塵積雨梧葉霜飛風柳條露凝殘點
見紅日星曳餘光橫碧霄虛飄飄比浮名利猶堅牢

和游金山

和子由同彥瞻

江流會揚子汨汨東南驚海門
劃前開金山屹中據鼓鍾
食萬指金艫棲千柱
夜庭游月波曉觀搏香霧
天清猿鳥哀風暗魚龍怒
雲物橫古今濤波閱晨暮
三州氣色來上下端倪露偉哉
元氣間此勝知誰聚
念昔憇精廬登臨輒忘去
汲新試團月飯素羹魁芋妙興入芳藤
真境在芒屨別來星暑換寤寐經從處
忽蒙珠璧投了與雲巒遇幽光炯肝肺
爽氣森庭戶區中多滯念方外

饒奇趣寄語山阿人冷然行復御詩云瞻遊金山子由

隱隱大如憤竭來長江上孤高二千尺僧居厭山小面
面貼蒼石虛樓三百間正壓江潮白清風歛霽霧曉日
曜金碧直侵魚龍居似有鬼神役我行有程度欲去空
自惜風吹渡江水山僧午方食波瀾洗我心笋蕨飽我
腹平生足遊行壯觀此云極鐵甕本誰安海門復誰植
東南遮隱見遙與此山足茲遊幾不遂深愧幕府客歸
時日已暮正值江月黑顧視天水并坐恐星斗濕使君
何時罷登覽不可失子由同彥瞻遊金山子由枉詩
卒章有使君何時罷登覽不可失之句因繼賦一簪子
駿蓬萊二神山橫絕倚鼇背鼇傾海水動一峰失所在
飛來大江心盤礴幾千載化為金僊居龍象錯朱貝風
昔愛山水江湖不雙忘君前或剖竹匏繫古維揚隱然
勝絕境旦旦遇相望不意二君子招携一葦航高攀躡
雪梯澗視瞰溟漲潮來隱天地萬里卷白浪波清霄漢

淨澄澈迷下上更深月正中山影杳無象蛟鼉四面穴
形勢三州壯融結既難窮丹青殊莫狀蘇侯韻高遠邵
子雅趨尚奇觀極無邊幽尋端未放浮生閱流水清話
造方丈畢景趣言歸侵星搖兩槳武功真好奇落筆掃
珠璣持語淮南守茲遊不可遺君
恩早晚東南下一棹扁舟信所之

同子瞻端午日遊諸寺賦得深字

太史抱孤韻暢懷在登臨別乘載鄒枚佳辰事幽尋參
差水石瘦窅窕房櫳深清磬發疎箔妙香橫素襟復登
窰堵波環回矚岷峯雙溪貫城郭暝色帶孤禽涼飈動
爽籟薄雨生微陰塵想澹清漣牢愁洗芳斟揮簞訂往

古援毫示來今愧無刻燭敏續此金玉音


子瞻詩云肩輿任所適

遇勝輒留連焚香引幽步酌茗開淨筵微雨止還作小
窻幽更妍盆山不見日草木自蒼然忽登最高塔眼界
窮大千卞峰照城郭震澤浮雲天深沉既可喜曠蕩亦
所便幽尋未云畢墟落生晚烟歸來記所歷耿耿清不
眠道人亦未寢孤燈同夜禪

寄陳季常

一鉤五十牂始具任公釣揭竿趣灌瀆與爾不同調先
生本西蜀俠氣見英妙哀憐世間兒細點似黃鸝侍童
雙擢玉鬢髮光可照駿馬錦障泥相隨窮海嶠平生攜

手好十七登廊廟小生相吏耶徒枉尺書召暮年更折
節學佛得心要鬻馬放阿樊幅巾對沈燎泠泠屋外泉
兀兀原頭燒欲知山中樂萬古同一笑



淮海集卷三

欽定四庫全書

集部

淮海集卷八至

詳校官庶吉士臣汪彥博

侍讀臣孫球覆勘

覆校官中書臣田尹衡

校對官中書臣袁文邵

謄錄監生臣汪璉

欽定四庫全書

淮海集卷四

宋 秦觀 撰

同子瞻賦游惠山三首

其一 王武陵韻 其二 寶群韻 其三 朱宿韻

輟棹縱幽討
籃輿入青蒼
圓頂相邀迓
旃檀燎深堂
層巒淡如洗
傑閣森欲翔
林芳含雨滋
岫日隔林光
涓涓續清溜
靡靡傳幽香
俯仰佳覽眺
悠悠哉身世忘

使君厭機械
所與惟散人
顧慙蒹葭陋
繆倚瓊枝新
上干青礪礪
下屬白磷磷
洞天不知老
金界無棲塵
緬彼

人間世烏蟾閱青旻詎得踵三隱山阿相與隣

樓觀相複重邈然閟深樾九龍吐清泠瀲灩曾未絕巽

缶馳千里真珠猶不滅况復從茶僊茲焉試癸月岸巾

塵想消散策佳興發何以慰遨嬉操觚繼前轍

子瞻云余昔為

錢塘倅往來無錫未嘗不至惠山既去五年復為湖州

與高郵秦少游杭僧參寥同至覽唐處士王陵實群朱

宿所賦詩愛其語清簡蕭然有出塵之姿追用其韻各

賦夢裏五年過覺來雙鬢蒼還將塵土足一步倚瀾

堂俯窺松桂影仰見鴻鶴翔炯然肝肺間已作冰玉光

虛明中有色清淨自生香還從世俗去永與世俗忘

薄雲不遮山踈雨不濕人蕭蕭松桂滑策策芒鞋新嘉

我二三子皎然無淄磷勝遊宜殊昔清句仍絕塵弔古

泣舊史疾謔歌小戛哀哉扶風子難與巢許鄰敲火
發山泉烹茶避林樾明窓傾紫蓋色味兩奇絕吾生眠
食耳一飽萬想滅頗笑玉川子饑弄三百月豈如山
人睡起山花發一甌誰與共門外無來轍參寥同賦
山烟弄滅沒山木含蒼刺舟傍遙岸理策升虛堂
周遭矚層嶽矯矯如翔翔下瞰平田流澹然浮日光
篁解初籜洗雨聞新香雖云迫前途真賞豈易忘松
門暗朝雨寂歷無行人隆曦忽穿漏卉木鬱以新堦
漱石齒照眼光磷磷使君美無度卓犖遺囂塵風標
竹栢談笑凌窮旻何愧沈冥子卧霞吞結鄰揚帆渡
江來洗眼驚翠樾雲姿既容裔鳥弄更清絕凌梯訪
蹤琬琰亦未滅嗟我魚目光疇能綴明月狂墨掃琅
風烟座中發殊勝區
中人茫茫走飛轍

馬上口占二首

向晨結束事長途利風刮面冰在鬚岡窮得水馬不進
霧暗失道人相呼悠悠旁舍見汲井軋軋隔林聞輓車
游目騁懷自可樂勿憶鄉縣增煩紆

霜風稜稜萬木枯梅花破萼猶含鬚田家往往事游獵
追逐狐兔相號呼微茫山中起狂燒隱約林梢低日車
馬頭漸覺有佳趣勿厭阡陌多縈紆

別子瞻

人生異趣各有求繫風捕影祇懷憂我獨不願萬戶侯

惟願一識蘓徐州徐州英偉非人力世有高名擅區域
珠樹三株詎可攀玉海千尋真莫測一昨秋風動遠情
便憶鱸魚訪洞庭芝蘭不獨庭中秀松柏仍當雪後青
故人持節過鄉縣教以東來償所願天上麒麟昔漫聞
河東鸞鷟今纔見不將俗物擬天真北斗已南能幾人
八埒學士風標遠五馬使君恩意新黃塵冥冥日月換
中有盈虛亦何筭據龜食蛤暫相從請結後期游汗漫

子瞻詩云 夜光明月非所投逢年遇合百無憂將軍
百戰竟不侯伯郎一斗得涼州翹關負重君無力十年

不入紛華域故人坐上見君文謂是古人吁莫測新詩
說盡萬物情硬黃小字臨黃庭故人已去君未到空吟
河畔草青青誰為他鄉各異縣天遣君來破吾願一聞
君語識君心短李髯孫眼中見江湖放浪久全真忽然
一鳴驚倒人從橫所植無不可知君不怕新詩新千金
弊帚那堪換我亦淹留豈長筭山中既未決同歸我聊
爾耳君其漫淮南三歲吾何求使君到後消人憂君
言有客輕公侯扁舟相從古揚州置之匹馬恨無力千
里相忘同異域新詩空使四座驚隱居未易凡人測使
君南歸無限情鴻飛携書陸我庭此書兼置昔年客袖
中麗句淮山青老夫強顏依府縣堆案文書非本願清
談壺壺解人願安得座右長相見狂客吾非賀李真醉
吟君似謫仙人末契長遭少年笑白髮應慙傾蓋新都
城酒貴誰當換塵埃始面非良筭歸來泗上正思君莫
待黃花霜爛漫

和黃法曹憶建溪梅花

海陵參軍不枯槁
醉憶梅花愁絕倒
為憐一樹傍寒溪
花水多情自相惱
清淚班班知有恨
恨春相逢苦不早
甘心結子待君來
洗雨梳風為誰好
誰云廣平心似鐵
不惜珠璣與揮掃
月沒參橫盡角哀
暗香銷盡令人老
天分四時不相貸
孤芳轉盼同衰草
要須健步遠移歸

亂插繁華向晴昊

參寥詩云
茅齋欲飲倒

朔風蕭蕭方振槁
雪壓門前誰送一
枝梅問訊

山僧少病惱強將
筆力為摹寫
麗句已輸何遜
早碧桃丹杏空自
妍
妍
嚼
菜
羹
香
無
此
好
先
生
携
酒
傍
玉
叢
醉
裏

雄辭驚電掃東溪不見謫仙人江路還逢少陵老我雖
不飲為誰牽不惜山衣同藉草要須陶令揮花歸醉卧
春風軼軒吳子瞻和少游詩云西湖處士骨應槁
只有此詩君壓倒東坡先生心已灰為愛君詩被花惱
多情立馬待黃昏殘雪消遲月出早江頭千樹春欲暗
竹外一枝斜更好孤山山下醉眠處點綴裙腰紛不掃
萬里春隨逐客來十年花送佳人老去年花開我已病
今年對花還草草不如風雨卷春歸收拾餘香還畀吳
子瞻和參寥詩云化工未識蕪羣槁先向梅花一
傾倒江南無雪春瘴生為散冰花除熱惱風清月落無
人見洗粧自赴嚴鍾早惟有飛來雙白鷺玉羽瓊樹闌
爭好吳山道人似水眼淨塵空無可掃故將妙語寄
多情橫機欲寄東坡老東坡習氣除未盡時復長篇書
小草且撼長條飡落英忍饑未忍呼穹昊子由和少
游詩云老夫毛骨日凋槁愁見米鹽惟醉倒忽傳騷
客賦寒梅感物傷春同懊惱江邊不識北風勁牆頭知

有南枝早未開素質夜光明半落清香春更好鄰家小
婦學閑媚靚粧惟有長眉掃孤芳已與飛霞競結子仍
先百花老苦遭橫笛亂飛英不見遊人醉芳草可憐物
性空自知羞作繁華助芒昊子由和參寥詩云
君古木依岩槁西江飲醉須彌倒野花幽草亦何為
語長篇空自慳萬點浮溪輒長嘆一枝過嶺誇先早
香不忍游塵污嚼葉更憐真味好道人遇物心有得
竹相敲緣自掃誰知真妄了不妨令我至今思捷老
明真覺昔未識但向閑窓看詩草浮
雲時起鳥四飛畢竟安能亂清昊

送少章第赴仁和主簿

我宗本江南為將門列戟中葉徙淮海不仕但潛德先
祖實起家先君始縫掖議郎為名士余亦忝詞客風流

以及汝三通桂堂籍汝弱不好弄文章有新格久從先生游術業良未測武林一都會山水富南國下有賢別駕上有明方伯千將入砥礪騷裹就銜勒勿矜孔鸞姿不樂棲枳棘吳中多高士往往寄老釋辯才雖物化參寥猶夙昔投閑數訪之可得三友益少來輕別離老去重乖隔念汝遠行役惘惘意不懌道山雖云佳久寓有饑色功名已絕意政苦婚嫁迫終從大人議稅駕邦溝側追蹤漢兩疏父子老阡陌

送李端叔從辟中山

人畏朔風聲我聞獨寬懷豈不知凜冽為自中山來
端叔天下士淹留蹇無成去從中山辟良亦慰平生
與君英妙時俠氣上參天孰云行半百身世各茫然
當時兒戲念今日已灰死著書如結甃聊以忘憂耳
駸駸歲道盡淮海歸無期功名良獨難雖成定奚為
念君遠行役中夜憂反側攬衣起成章贈以當馬策

淮海集卷四

欽定四庫全書

淮海集卷五

宋 秦觀 撰

贈蹇法師翊之

天都九經緯人物如紡績豈無仙聖游但未見高識蹇
師蜀方士鬼物充服役竭來長安城摩挲金銅狄大蛇
死已論葛陂囚且釋是事何足云聊爾恤艱厄方從馬
明生西去鍊金液丹成得度世造化為莫逆予亦江海
人名宦偶牽迫投劾去未能見師三歎息

送劉貢父舍人二首

虎去藜藿採珠在其川媚君子一訕信實繫天下事念
昔元豐間公初謫南裔託詞弔湘水聞者為心醉踰年
儉臣逐國老起相繼除公守襄陽士始有生意茲馬歸
法從乃是朝廷計在公何足云事業本餘棄振垣美花
木入直春正麗同僚看家風立馬揮九制

觀也本諸生早與世參商方枘不量鑿交親指為狂末
路辱公知賜出非所望相期古人處豈止事文章汝南

雖與區校官實始張解鞅百無有栖栖寄僧坊築室從
有徒皆公借餘光一壺千金直所濟在倉黃萬里猶比
鄰別離無足傷何以報公德修好以為常

南京妙峰亭

王勝之所作
撫子瞻題榜

王公厭承明出守南宮鑰結構得崇丘巋然瞰清洛是
時謫仙人發軔自廬霍郊原春鳥鳴來此動豪酌報投
一何富玉按金刀錯新榜揭中楹千載見遠託竭來訪
陳迹物色屬搖落人烟隔鳬鴈田疇帶城郭紅蕖隕風

漪砂礫卷飛籜青青陵上姿獨汝森自若人生如博奕
得喪難前約金鉞初控頤已復東方作大明昇中天龍
鸞入階閣深懲漁奪弊法令一刊削斯民如解懸喜氣
鬱磅礴公乎數登覽行矣翔寥廓

次韻奉酬丹元先生

金華紫烟客來作牧羊兒至言初無文尋繹自成詩二
景入妙解元氣含烟詞憐我鬣蒼浪黃埃眩蟲絲勸解
冠上纓一濯含風漪攝身列缺外倒躡蜿蜒鬢維斗錯

明珠望舒耿脩眉真游無疆界浩蕩天風吹

送裴仲謨

君子出於德妙高如匠石但見廣厦成不見斧斤迹厚
為諸兄奉自奉頗云嗇三生陽亢宗薄俗有慙色汝南
古佳郡月旦評一易爾來似揚州不辨龍蜥蜴短簿髯
叅軍喜怒移頃刻正平竟獲免實我文舉力念公多乖
隔憂思如紡績耻為兒女仁到此淚橫臆熙朝大烹飪
賢者不家食朝為郡縣吏暮作臺省客矧聞諸法從久

欲薦言責去去勿重陳九萬自此擊

題雙松寄陳季常

遙聞連理松託根黃麻城枝枝相鉤帶葉葉同死生雖
云金石姿未免兒女情想應風月夕蒲庭合歡聲

徐仲車食於學官吏或以為不可欲罷去之太守
不聽禮遇如初感之而作

許丞老病聾督郵白欲廢賢哉黃次公鑒裁實精詣殷
勤謝督郵此丞乃廉吏重聽庸何傷善助無失意古人

骨已朽來者復誰繼仲車天下士固非許丞類至行通
神明問學有根柢若充老更聘自草風俗弊太守前已
聞粟帛俄見賜奈何少年子輒効督郵事道喪賢哲窮
聞之為流涕人心如其面難以一律揆所望在次公督
郵何足議

次韻夏侯太冲秀才

儒官飽閑散室若僧坊靜北窓腹便便支枕看斗柄或
時得名酒停午猶中聖醒來復何事秉筆賦秋興焉知

懶是真但覺貧非病茫茫流水意會有知音聽鐘鼎與
山林人生各天性

送張和叔兼簡黃魯直

汝南如一器百千聚飛蚊終然鼓狂鬧啾啾竟誰聞議
郎盛德後清修繼先芬未試霹靂手低回從此君學官
冷於水蘢鹽度朝曛間蒙相煖熱破憂發孤欣君今又
復去冀北遂空羣豈無一樽酒誰與通殷勤大梁多豪
英故人滿青雲為謝黃叔度鬢毛今白紛

題驤裊圖

雙瞳夾鏡權協月尾鬣蕭森澤於髮鞍銜不施韁復脫
旁無馭者氣騰越地如砥平丘隴滅天寒日暮抱饑渴
驤首號鳴思一發超軼絕塵入恍忽東門金鑄久銷歇
曹霸丹青亦云沒賴有龍眠戲揮筆眼前時見千里骨
玉臺閭闔相因依嗟爾龍媒空自奇鸞旗日行三十里
焉用逐風追電為

和東坡紅鞵帶

君不見相如容貌窮不枯卓氏恥之分百奴一朝奉旨
使筇笻駟馬赤車從萬夫仲元君平更高妙寄食耕卜
霜眉鬚兩川人物古不乏數子風流今可無參軍少年
飽經術期作侍中司御壺老披青衫更矍鑠上馬不用
兒孫扶一朝忽解印綬去恥將詩禮攘裙襦懸知百年
事已定却笑列仙形甚臞東阡北陌西風入瑞草橋邊
人叫呼相見紅圍照白髮頽然醉卧文君壚

和王忠玉提刑

嵩峰何其高峰高氣尤清念昔秋欲老從公峰下行古
木上參天哀禽報新晴脩塗雲外轉槁葉風中零曛黑
度伊水眇然古今情黎明出龍門山川莽難名信美非
吾土顧瞻懷楚萍美人天一方傷哉誰目成黃綬我盻
爾白鷗公勿驚糟醕可饋啜古人忌偏醒

題楊康功醉道士石

黃冠初飲何人酒徑醉頽然不知久風吹化石楚山阿
藤蔓纏身薜封口常隨白鶴亦飛去但有衣冠同不朽

異物終為賢俊得野老田夫豈宜有華陰楊公香按吏
一見遂作忘年友日暮西垣視草歸往往對之傾數斗
大夢之間無定論啓母望夫天所誘穀城或與子房期
西域更為陳郝吼我疑黃冠反見玩若此堅頑定醒否
何當一笑凌蒼霞顧謝主人聊舉手

送蔡子驤用蔡子駿韻

越絕山川遠相屬萬壑千巖抱青綠卧龍一峰稱是奇
遶趾清漪如帶束鏡水春生鷓尾銜稽山日暮猿聲續

三休上與蓬萊接登眺使人遺寵辱我昔東游觀禹穴
痛飲狂歌得所欲上天何曾有官府鸞鳳日日遭鞭扑
僧坊畫壁閱幾偏神妙難忘獨金粟華胥夢斷已十年
又見春風煮餠粥苧羅若耶固依舊可憐雲月誰追逐
故人淡泊出天性鷦鷯巢林一枝足不肯絃歌甘筦庫
還同市門隱梅福惟應月下小叢歌尚有哀音傳舊俗
飲酒詩四首

我觀人間世無如醉中真虛空為消隕况乃百憂身惜

哉知此晚坐令華髮新聖人難驟得得且致賢人

左手持蟹螯舉觴屬雲漢天生此神物為我洗憂患山
川同恍惚魚鳥共蕭散客至壺自傾欲去不容間

客從南方來酌我一甌茗我酌初不啜彊啜且復醒既

鑿渾沌氏遂出華胥境操戈逐儒生舉觴還酹酊

氏一作竅

雷觴淡如水經年不濡脣爰有擾龍系為造英靈春英
靈韻何高蒲萄難為鄰他年血食汝應配杜康神

艇齋

并序

予以典校史領俸錢塘邂逅得友丁君彥良於陳留官
舍丁君彥良年少氣雋誦詩文亶亶不休動有過人語
深恨得之晚也臨分以艇齋詩速予賦為寄題一篇
平生樂漁釣放浪江湖間兀兀寄幽艇不憂浪如山聞
君城郭居左右羣書環有齋亦名艇何時許追攀釣古
不釣今所得孔與顏不然如爾祖跨鶴出塵寰

和裴仲謨放兔行

兔饑食山林兔渴飲川澤與人不瑕疵焉用苦索天

寒草枯死見窘何太迫上有蒼鷹禍下有黃犬厄一死
無足悲所耻敗頭額敢期揮金遇倒橐無難色雖乖獵
者意頗塞仁人責免兮免兮聽我言月中仙子最汝憐
不如亟返月中宿休顧商巖并嶽麓

和裴仲謨摘白鬚行

仲將題凌雲比訖鬚盡白陸展媚側室星星染為黑人
生如寄耳况復形與色澤壑藏山舟夜半輸有力龐眉
三不遇已矣何所惜二毛賦秋興自愛頗姑息聞諸古

竺乾毛髮因地得數窮反其本螻蛄得而食妙年光可
鑒炯若鴉羽戢映梳漸蕭蕭變化了無隙所以梵志云
昔人已非昔皤然君勿笑子羽以貌失信美如客兒終
翦施摩詰我作白鬚行而得養生術

淮海集卷五

欽定四庫全書

淮海集卷六

宋 秦觀 撰

覲覲二弟作小室請書魯直名曰寄寂作此寄之
用孫子實韻

力田不逢年識者未宜閔他時歲在金百兩無虛糗士
生當自量天道平如準汝兄魯叔山正坐不前謹有琴
亦無絃何心尚求軫客來欲頽玉大白輒滿引官長既
屢罵諸生亦時覲一口吸西江玄哉居士蘊歲寒知蒼

松日暮識丹槿夢想八九椽森然羅玉筍

孫子實詩
薛宣欲吏雲

季氏或招閔此分胃中秋萬物既收相賣藥偶知名草
玄非近準才難不易得志大略細謹士生要弘毅天地
如益軫驥令鹽車驟井下知綆引難甘吁尔食聊寄菜
然輟誰能借前籌還婦用束蘊吾聞調羹鼎異味及粉
槿豈其供王羞
而棄會稽笋

南都新亭行寄王子發

洛水沄沄天上動道入隋渠下梁宋宋都堤上十二亭
一一飛驚若鸞鳳光華遠繼周王雅宴喜還歸魯侯頌
玉觴嚴令肅衣冠金縷哀音繞梁棟娟娟殘月照波翻

習習暖風吹鳥哢何處高帆落文鷁誰家駿馬嘶征鞚
柳枝芳草恨連天暮雨朝雲同昨夢借問亭名製者誰
留守王公才望重胸中雲夢吞八九日解千牛節皆中
祥符相公實曾祖庭列三槐多伯仲承明厭直出荊州
轉守此都行大用此都去天纔尺五交廣荆揚歸引控
兎園事迹化黃埃清冷文雅堪長慟舳艫銜尾車挂轄
昨日出迎今日送送故迎新無已時古往今來相戲弄
亭下嶽崎淮海客末路逢公詩酒共一樽明日難重持

宜恤官期後芒種今年氣候頗云早天矯梅花春欲縱
行見亭中祖帳開千乘送公歸法從

反初

昔年淮海末邂逅安期生謂我有靈骨法當遊太清區
中緣未斷方外道難成一落世間網五十換嘉平夜參
半不寢披衣涕縱橫誓當反初服仍先謝諸彭晞髮陽
之阿輔餽太和精心將虛無合身與元氣并陟降三境
中高真相送迎琅函紀前績金蒲錫嘉名耿光洞寥廓

不借日月明故棲黃埃裏絕想空復情

寄蓴薑法魚糟蟹

寄子瞻

鮮鯽經年漬醢醢團臍紫蟹脂填腹後春蓴茁滑於酥
先社薑芽肥勝肉鳧卵累累何足道飮餽盤殮亦時欲
淮南風俗事瓶罌方法相傳為旨蓄魚鱠蜃醢薦邊豆
山蔌溪毛例蒙錄輒送行庖當擊鮮澤居備禮無麋鹿

精思

精思洞元化白日昇高旻俯仰凌倒景龍行速如神半

道過紫府弭節聊逡巡金牀設寶几璀璨明月珍僊者
二三子眷然骨肉親飲我霞一杯放懷暖如春遂朝玉
虛上冠劍班列真無端拜失儀放斥令自新雲霄難遽
返下土多埃塵淮南守天庖嗟我實何人

送楊康功守蘇

公於萬事輕獨嗜山水重寓直西掖垣滄洲長入夢廣
陵以都會厨酒萬斯甕每歎闕登臨持此將焉用比持
蘇臺節論鬱縉紳共翻云美泉石汜可小嬉弄忽忽治

行李草草別賓從乃知仁智心所樂異庸衆梅花發春
端百卉日興動公等行復反臺閣俟鸞鳳

偶戲

偶戲失班龍坐謫崑崙陰崑崙一何高去天無數尋嘉
禾穗盈車珠玉烱成林天飈時一拂清哀動人心一面
四百門官蕉雲氣侵闕然竹使符難矣暫登臨羣仙來
按行憐我久滯淫力請始云免反室歲已深親朋喜我
來感歎或霑襟塵寰君勿悲殊勝巢欽崙

次韻黃冕仲寄題順興步雲閣

故山無期大刀頭黃塵溽暑未罷休步雲之篇忽我投
便見冰玉懸清秋順興山川甲閩甌無風萬壑松飈飈
步雲之人人品優御風禦寇真其儔仙人乘槎凌斗牛
回環十見天星周猿鶴忽驚空蕙帳周家正要礪溪望
正仲左丞生日

元氣鍾英偉東皇賦炳靈
藹敷十一英椿茂八千齡
汗血來西極搏風出北溟
之無分襁褓詩禮學趨庭
妙質

珠遺海高材刃發硎初更芸閣秘屢直瑣闥青史筆開
凡例綸言正緯經文昌頻曳履京兆屢空圉遂總臺綱
紀常參國典刑兩宮隆眷遇諸夏聳瞻聽武略驅雷電
文鋒粲斗星乞閑辭亢滿分逸下青冥綺甲雙朱服腰
橫萬寶釘明峰春蠹蠹汝水暮泠泠散策花間徑揮犀
水上亭壺觴延墨客燈燭按歌伶周袞歸公旦商巖夢
武丁久聞虛揆席佇見返皇局別數汾陽考重鑄宋父
銘巍然廟堂上永作世儀形

病犬

犬以守禦用老憊將何為踉蹌劣於行累然抱渴饑主人恩義易乃為升斗資追隨不肯去猶若戀藩籬屠膾意得逞烹庖在湏斯糟糠固非意豚豕同一時念昔初得寵青韁纏璫絲飼養候飢飽動止常相隨胡云不終始委逐在衰遲犬死不足道固為主人悲

贈女冠暢師

瞳人剪水腰如束一幅烏紗裏寒玉飄然自有姑射姿

回看粉黛皆塵俗霧閣雲牕人莫窺門前車馬任東西
禮罷曉壇春日靜落紅滿地乳鴉啼

和子瞻雙石

天鑪海濱石鬱若龜毛綠信為小仇池氣象宛然足連
巖下空洞鼎張彭亨腹雙峰照清漣春眉鏡中戲疑經
女媧鍊或入金華收鑪熏充雲氣研滴當川瀆尤物足
移人不必珠與玉道傍初無異漢將疑虎伏支機亦何
據但出君平卜奇礪入華林傾都自追逐我願作陳那

令吼震山谷一拳既在夢二駒空所欲大士捨寶陀仙人遺句曲惟詩落人間如傳置郵速

徐得之閑軒

建安自古多俊髦徐子磊落尤其豪論兵說劍走湖海身勤事左無所遭綠水五校已屠膾黑衣三衛嗟徒勞歸來故山便卜築脫棄萬事輕鴻毛橫前澗水漱哀玉傍舍老櫪藏飛猱山蔬何用媿梁肉鶴髦未必輸青袍追寒弄月有真意慎勿輕語傳兒曹

雷陽書事

駱越風俗殊有疾皆勿藥東帶趨祀房瞽史巫紛若絃
歌薦繭栗奴主洽觴酌呻吟殊未央更把雞骨灼

一笛一腰鼓鳴聲甚悲涼借問此何為居人朝送殤出
郭披莽蒼磨刀向猪羊何須作佳事鬼去百無殃

舊傳日南郡野女出成羣此去尚應遠東門已如雲蚩
氓託絲布相就通慇懃可憐秋胡子不遇卓文君

海康書事十首

白髮坐鉤黨南遷海瀕州灌園以餬口身自雜蒼頭籬
落秋暑中碧花蔓牽牛誰知把鋤人舊日東陵侯

荔子無幾何黃柑遽如許遷臣不惜日恣意移寒暑層
巢俯雲木信美非吾土草芳自有時鴨鵝何關汝

卜居近流水小巢依嶽岑終日數椽間但聞鳥遺音鑪
香入幽夢海月明孤斟鷓鴣一枝足所恨非故林

培塿無松栢駕言出焉遊讀書與意會却掃可忘憂尺
蠖以時詘其信亦非求得歸良不惡未歸且淹留

粵女市無常所至輒成區一日三四遷處處售鰕魚青
裙脚不襪臭味援與狙孰云風土惡白州生綠珠
海康臘已酉不論冬孟仲殺牛撾祭鼓城郭為沸動雖
非堯歷頌自我先人用大笑荆楚人嘉平獵雲夢
粲粲菴摩勒作湯美無有上客賦驪駒玉奩開素手那
知蒼梧野棄置同芻狗荆山玉抵鵲此事繇來久
裔土桑柘希蠶月不紡績吳綃與魯縞取具艸船客一
朝南風發家室相怵迫半賈鬻我藏倍稱還君息

一雨復一暘蒼茫颶風發怒號兼晝夜山海為顛蹶云
何大塊噫乃爾不可遏黎明衆竅虛白日麗空闊
合浦古珠池一熟胎如山試問池邊蜃云今累年閑豈
無明月珍轉徙溟渤間何關二千石時至自當還

次韻曾存之嘯竹軒

翩翩曾公子子猷定前身嗜好準疇昔了然不緇磷寄
食平準官植竹當比鄰朝與竹相對暮與竹相親安可
一日無此君真可人

游仙二首

服形百神朝，剗心萬緣盡。我無退轉境，何以有精進。戲
為汗漫游，八極一何近。渺渺東海水，累累北邙墳。向來
歌舞處，忽復成荒村。愚人如鹿耳，其死了無魂。孰知九
霄間，玄圃枕崑崙。緇塵化人衣，蒼蘿誰與捫。

雲車自天來，駕言游混沌。手持太一節，身佩使者章。龍
虎傍天矯，馬龜伏以翔。朝元紫微上，所覩浩難量。寶網
結萬珠，參伍相焜煌。花品不知數，妙英拆玄房。宮殿隨

人身處處輒清凉危髻擢真玉高謝人間粧二
三古鬚眉冠雲帶含光遺我飛霞佩副以明月
璫再拜敬服之
白毛發靈香

次韻荅張文潛病中見寄

與君涉世網所得如鈎溫念昔相乖離俯仰變
寒暄把袂安可期寄書囑加飧三年汝水濱孤
懷誰與言末路非所望聯鑣金馬門校文多豫
暇玄談到羲軒孰云簞簞小史書垂後昆匪惟
以舊聞抵牾良可刊比枉病中

作筆端淮海奔亟駕問所苦兀坐一室閑晤對不知夕
歸途斗星翻平時帶十圍頗復減臂環君其專精神微
恙不足論愷悌神所勞此理真如絃

送喬希聖

鷗翔蓬蒿非所悲鵬擊風雲非所喜貴賤窮通盡偶然
回頭總是東流水我思田文昔相齊朱袍照日如雲霓
三千冠佩醉明月清歌一曲傾玻璃如今陳迹知何在
但見荒冢烟蕪迷又思原憲昔居魯門戶東西閑環堵

杖藜對客騁高談自覺胸襟輩堯禹如今寂寞已成塵
空有聲名掛千古送君去何時回世間如此令人哀我
徒駐足不可久笑指白雲歸去來

與子瞻會松江得浪字

松江浩無旁垂虹跨其上漫然銜洞庭領略非一狀況
如陣平野萬馬攢穹帳離離雲抹山窅窅天粘浪烟中
漁唱起鳥外征帆颭愈知宇宙寬斗覺東南壯太史主
文盟諸豪盡詩將超搖外形檢語笑供頽頽嬾娟棄追

逐撥刺亦從放獨留三百缸聊用沃軒曠

子瞻得風字
吳越溪山

興未窮又扶衰病過垂虹浮天自古東南水送客今朝
西北風絕境自忘千里遠勝遊難復古人同舟師不會
留連意擬看斜陽萬頃紅二子綠詩老更窮人間無
處吐長虹平生睡足連江雨盡日舟行擘岸風人笑年
來三黜慣天教我輩一罇同知君欲偁長相憶更送銀
盤尾鬣紅參寥得岸字蜿蜒跨長虹吳會稱傑觀
淪連幾萬頃放目失根岸倒境射遙山青螺點空半從
來誇震澤勝事無昏旦破浪湧長鬢排空度飛翰肺肝
入清境劃若春水泮安得凌九垓從公遊汗漫

淮海集卷六

欽定四庫全書

淮海集卷七

宋 秦觀 撰

德清道中還寄子瞻

投曉理竿棹溪行耳目醒蟲魚各蕭散雲日共晶熒水
行重深翠烟山疊亂青路回逢短榜崖斷點孤翎叢薄
開羅帳淪漪寫鏡屏踈籬窺窈窕支港泛苓箬遠淑依
微見哀猿斷續聽夢長天杳杳人遠樹冥冥旅思搖風
旆歸期數月冀何時燃蜜炬復聽閣前鈴

次韻子由題斗野亭

滿市花風起平堤漕水流不堪春解手更為晚停舟上

埭天連鴈荒祠木蔽牛杖藜聊復爾轉眄夕烟浮

子由詩云

細雨添春色微風靜閑流勞生兩蓬鬢生計一扁舟
飲食隨魚蠅封疆入斗牛風波方在眼轉覺此生浮

鮮于子駿使君生日

往昔高堂夢熊羆兆吉占氣鍾西蜀秀時應仲秋嚴江
漢揮犀尾風雲下筆尖微辭追屈宋精義到黃炎操履
森寒栢名聲耿夜蟾擊彊鵬鶚健治劇鷗鷯銛使者旌

旄易將軍印綬添鴛鴻隨步武虎豹入韜鈴錦覆郎官
綬彤垂太守襜兩行分蜜炬十里上珠簾禮士常懸榻
誅姦或奮髯雨堂昏絳帳風帙亂牙籤銀漢星初換金
莖露已霑歡聲連北固壽邑亘東漸麗句充文几奇香
叔玉奩簪紳五福具罇俎四難兼賤子真殊幸清標獲
屢覘誤蒙雕朽木猥辱畫無鹽嘉運方熙洽英才豈滯
淹佇公歸法從行道慰民瞻

輦下春晴

樓闕過朝雨參差動霽光衣冠紛禁路雲氣繞宮牆亂絮迷春闊蔦花困日長經旬牽酒伴猶未獻長楊

睡起

睡起東軒下悠悠春緒長爬搔失幽轉欸欠墮危芳蛛網留晴絮蜂房受晚香欲尋初斷夢雲霧已冥茫

次韻革老初至湯泉二首

夾路山重複參天樹老蒼一區成小市數埒引溫湯洗沐同幽客鋪飧就梵坊未輸朝市子斗酒得西涼

年華行已老林莽尚葱蒼地勝連龍洞泉溫注鬼湯人

風遠城市鍾梵近僧坊九夏來投錫棲心應更涼

葦老詩云

川谷闊深阻天時正莽蒼聊同不速客來浴自然湯茂宰藹休政道人棲淨坊恍如登十地熱惱頓清涼

過六合水亭懷裴博士次韻三首

次葦老

昔同裴博士酌酒俯庭柯晚岫潭潭碧風池瑟瑟波蒼崖遺老沒白首故人過轉眄成陳迹勞生可奈何

晚憇孤亭上羸驂繫斷柯荒門寒帶路空檻閣增波往事青山在餘生白鳥過誦言成絕語疊疊迫陰何

折柳相從地重來失舊柯
林光延晚照岸影動微波
隔浦檀欒密當簷翡翠過
主人成異物搔首奈情何

懷孫子實

舉眼趨浮末斯人獨好修
青春三不惑黃卷百無憂
玉出方流潤鸞停翠竹幽
相思自成韻不必寄西郵

對淮南詔獄二首

一室如懸磬人音盡不聞
老兵隨卧起漂母給朝飧
樊雉思秋野鞫鷹望暮雲
念歸忘食事日減臂環分

淮海行搖落文書亦罷休
風霜欺獨宿燈火伴冥搜
筋動朱樓曉參橫粉堞秋
更拚飛鏡破應得大刀頭

次韻荅米元章

嗜好清無滓周旋粲有文
揮毫春在手岸憤海生雲
花鳥空撩我蓴鱸正屬君
惟應讀雌蜺差不愧王筠

宿參寥房

鄉國秋行暮房櫳日已暝
驚風多犯竹破月不藏星
鉤箔簷花動抄書燭燼零
非關相見喜自是眼長青

次韻蔣頴叔南郊祭告上清儲祥宮

二十
六韻

特起朝陽內祠宮極邃清高窓闕玉女巨闌守昌明盛
掩秦諸峙雄逾漢兩京垣橫天上紫洲露海中瀛黃帝
初龍躍中原罷虎爭樵夫亦談道行旅不持兵此地修
禳禳于時保利亨栢梁災未幾陳寶詔重營御帟金繒
出慈闈服玩并標題動宸翰撰次屬鴻生玉刻黃冠印
金書祕殿名妙經藏洞觀真籙佩威盟仙溜花間靜瓊
枝物外榮肇禋承帝祉肆青順民情天施寧論報風行

不計程近傳聞磬管時或見旄旌海嶽朝雙闕星辰集
上楹禮如尊太一事異寵文成大似圓丘報長於至日
迎侍臣來祭告法駕欲時行釐事通元氣高真達孝誠
慶增黃帝系壽續太陰精西北夷門峻東南輦路傾雲
行博山氣風卷步虛聲符貺方期應英髦各彙征謳歌
興法從行見泰階平

次韻米元章齋居即事

庭水雙株茂盆池一掬慳支頤魚出樂入背鳥知還老

卷七
境行將及仙書讀未閑因君歌鳳過通夕夢歸山

次韻酬陳傳道

白髮三冬學青衫八尺身誰知人上傑聊作吏中循揮
翰通元氣開編友古人寄聲張氏子曲逆豈長貧

次韻傳道自適兼呈都司芸叟學士

楚國陳夫子周南頗滯留弊袍披槁葉瘦馬兀扁舟藥
餌過三伏文書散百憂何人共禪悅居士有浮休

擬郡學試東風解凍

寶歷開新歲春回斗柄東
漪生天際水凍解日邊風
浩蕩依蘋起侵尋帶雪融
江河霜練靜池沼玉奩空
魚藻雍容裏雲霄俯仰中
更無舟楫礙從此百川通

駕幸太學

原廟初更十二章還輿詔蹕幸
諸庠法天璧水遙迎仗
應夜深衣不亂行風動四夷
將遣子禮行三舍遂賓王
前知此舉追虞氏果有球音發舜堂

題閭求仁虛樂亭三首

前二首 萃老

禪房幽構徑彎環
噪鵲鳴鳩盡日閑
隱几冥濛超物表
畫圖髣髴見林間
褰簾雲吐池中月
岸幘天橫竹外山
秋興已闌成麗句
板輿時此慰慈顏

長官平昔嗜林丘
僧與開亭待勝遊
脩竹回環扶碧瓦
小池方折轉清流
春深鷓鴣催詩句
夜靜蟾蜍入酒舟
只恐政成留不得
縣人空此憶常游

誰構新亭近翠微
似教陶令狎天機
池光引月來簷廡
竹影疏風到客衣
愛酒有時攜玉笋
無絃聊自拂金徽

人間此樂應無幾肯向良辰與物違

懷李公擇學士

一辭行旆楚亭臯幾為登臨掛鬱陶蓬斷草枯時節晚
山長水遠夢魂勞流傳玉刻皆黃絹早晚金閨報大刀
宣室方疑鬼神事順風行看駛鴻毛

次韻二首

青髮從遊各白袍老來邂逅更陶陶尺書繼月傳雙鯉
相見何時詠百勞諫草十年聊閣筆坐棠三郡不更刀

靈崖灤水堪行樂時事紛紛劇蜩毛

畫船京口見停橈
蕭洒渾疑謝與陶
但把好山供勝踐
不將餘論掛塵勞
諫垣天上經焚草
藩國年來屢夢刀
北路近傳新政美
未嘗因物彊吹毛

題湯泉二首

滿斛泠泠注不窮
幻塵乾慧洗皆空
法流水接諸天上
神漢香聞一國中
金粟示為除病惱
跋陀仍已獲圓通
馬蹄又入風埃去
回首吳吟謝迓翁

湯泉有迓翁

溫井霜寒碧甃澄飛塵不動玉奩清老翁仙去羸驂共
太子東歸廢沼平據石聊為寶陀觀決渠還落堰溪聲
洗腸灌頂雖殊事一洗勞生病惱輕

寄題王欽之自圓庵

誅茅北戶結圓廬從事風流入畫圖珠箔粉垣藏混沌
葛巾藜杖造虛無春閑居士天花室畫靜仙人白玉壺
遙想吏行鳬鷺散沈烟一穗對團蒲

流觴亭并次韻二首

縹緲雲巒欲盡頭
灑然華構別飛流
朱盤漱灩開冰鑑
碧甃縈紆走玉虬
毛骨漸驚超濁界
風烟驟覺變清秋
更憐白足如霜句
可羨溪邊六逸遊

卧龍西畔北池頭
水擘華堂瑟瑟流
幾曲漪連盤翠帶
一峰孤秀浴蒼虬
香囊近午清無汗
素扇生涼爽入秋
待喚畫師來貌取
圖成便是竹溪遊

遊龍門山次程公韻

路轉橫塘入亂峰
遍尋瀟灑興無窮
樓臺特起喧卑外

村落隨生指點中溪傍五雲清逗玉松分八面翠成宮
歸途父老欣相語今日程公昔謝公

遊龍瑞宮次程公韻

靈祠真館閼山隈形勢相高對越臺莓徑翠依屏上轉
藕花紅繞鑑中開鶴銜寶箭排烟去龍護金書帶雨來
夾道萬星攢騎火滿城爭看使君回

次韻朱李二君見寄二首

東阡北陌坐淹時偶為高風振羽儀十丈蓮花開處遠

三年楮葉刻成遲鬢毛但速安仁老錢粟難輸曼倩饑
尚賴故人遙省憶發揮春色有新詩

萬古流空一鳥沈衣冠常苦事違心七行俱下知君舊
四者難并笑我今梅已偷春成國色雲猶憑臘造天陰
美人綠綺煩遙贈莫致南金增永吟

睡足軒二首

長年憂患百端慵開斥僧坊頗有功地撒蔽虧僧界淨
人除荒穢玉奩空青天併入揮毫裏白鳥時興隱几中

最是人間佳絕處夢殘風鐵響丁東

數椽空屋枕清流一榻蕭然散百憂終日掩關塵境謝
有時開卷古人遊鳴鳩去後滄浪晚飛雨來初菡萏秋
此處便令君睡足何須雲夢澤南州

淮海集卷七

欽定四庫全書

淮海集卷八

宋 秦觀 撰

寄孫莘老少監

一出承明七換麾君恩復許上彤墀
白衣蒼狗無常態璞玉渾金有定姿
天上圖書森似舊人間歲月浪如馳
鰲頭只在蓬山畔行赴蟠桃熟後期

次韻馬忠玉喜王定國還自濱州

淮海相逢一解顏紛紛歲月夢魂間
初驚漁艇迷花去

忽認星槎拂斗還桂嶺暮登猿斷續槐堂春到鳥綿蠻
石渠舊議行當復未信佳時得自閑

寄李公擇郎中

節旄淮畔脫秋風忽跨鯨魚上碧空華秀兩跗當重露
文成五色在高桐江南又說衣冠盛廷右仍瞻禮樂隆
朝覲既升淮海見濛濛雨雪自消融

寄李端叔編修

旗亭解手屢冬春聞道歸來白髮新馬革裹尸心未艾

金龜換酒氣方振夢魂偷遶城月尊從公穿禁路塵
知有新編號橫槩為憑東使寄淮濱

寄題倪敦復北軒

倪郎才韻照冰壺北向開軒頗自娛簷度蕙風鳴鵲鵲
壁經梅雨畫蠅蚋籌交錯銀河掛文史縱橫角簫鋪
官舍私居同是漫莫嗟三徑就荒蕪

寄題盧君斗齋

俠氣軒軒翰墨場遭迴世路鬢成霜出從車馬行千里

歸與琴書寄一方鳥嘯入簾春欲破爐香侵夢日初長
扁舟會有山陽役聊借狂夫挹酒漿

次韻酬周開祖宣義

并州令尹古人風淮海相忘十載中麗句曉披花綽約
清談初扣玉丁東追攀昔共猗猗子嗜好今同桑苧翁
所惜華船輕解纜未窺笠澤故書叢

送王元龍赴泗州糧料院

子猷風味最諸王試吏聊懷筦庫章鵠峙碧桐初振羽

珠遺滄海漸騰光
淮山暮眺千峰耀
洛水秋輸萬鷁翔
顧我行爲大梁役
一卮薄酒話愁腸

次韻子由題九曲池

廣陵五題

蕭瑟通池閼茂林
岸傍無復屬車音
涵春似恨隋家遠
漲曉疑連蜀井深
關草事空煙冉冉
司花人遠樹陰陰

勞生俛仰成陳迹
縱有遺音可用尋

子由詩云
清彈怨廣陵
隋家

水調寄哀音可憐
九曲遺聲盡惟有一池春
水深鳳闕蕭條荒草外
龍舟想像綠楊陰
都人似有興亡恨
每到

殘春一

度尋

次韻子由題平山堂

棟宇高開古寺間，盡收佳處入雕欄。
山浮海上青螺遠，天轉江南碧玉寬。
雨檻幽花滋淺淚，風巵清酒漲微瀾。

遊人若論登臨美，須作淮東第一觀。

子由詩云：堂上平看江上山，晴光

千里對憑欄。海門僅可一二數。雲夢猶吞八九寬。蒼外小棠陰蔽芾，壁間遺墨涕洟瀾。人亡坐覺風流盡，遺構

仍須子細觀。

次韻子由題蜀井

蜀岡精氣滄多年，故有清泉發石田。
乍飲肺肝俱澡雪，

反窺杖屨亦輕便炊成香稻流珠滑煮出新茶潑乳鮮

坐使二公鄉思動放杯西望欲揮鞭

子由詩云東遊十一年

信脚

香稻憶歸田行逢蜀井恍如夢試煮山茶意自便短綆不收容盪濯紅泥仍許置新鮮早知鄉縣勝為客遊宦

何須更著鞭

次韻子由題摘星亭

迷樓舊址

崑崙左右兩招提中起孤高雉堞西不見燒香成宿霧

虛傳裁錦作障泥螢流花苑飛星亂蕪滿春城綠髮齊

長憶凭欄風雨後斷虹明處海天低

子由詩云孤高特地迷

闕角迷藏

渾忘日東西江流入海情無限暮雨連山醉似泥夢裏
興亡應未覺後來愁思獨難齊只堪留作遊觀地看遍
峰巒處處低

次韻子由題光化塔

古佛悲憐得度人應緣來現比丘身水流月落知何處
花發鶯啼又一春方外笑談清似玉夢中煩惱細如塵

老僧自說從居此却悔平時事遠巡

子由詩云山頭孤塔闕真人云是

僧伽第二身處處金錢追晚供家家蠶麥保新春欲求
世外無心地一掃胷中累劫塵方丈近聞延老宿清朝

留客語
逡巡

次韻子瞻贈金山寶覺大師

雲峰一變隔炎涼，猶喜重來飯積香。
宿鳥水干迎曉開，亂帆天際受風忙。
青鞋踏雨尋幽徑，朱火籠紗語上方。

珍重故人敦妙契，自憐身世兩微茫。

子瞻詩云：誰能斗酒博西涼，但記

齋厨法鼓香，往事真同一夢覺。高談誰洗五年忙，清風漫與山阿曲。明月常隨屋角方，稽首願師憐久客。直將歸路指茫茫。

遊鑑湖

畫舫珠簾出綠牆，天風吹到芰荷鄉。
水光入座杯盤瑩，

花氣侵人笑語香翡翠側身窺綠酒蜻蜓偷眼避紅粧
葡萄力緩單衣怯始信湖中五月涼

謁禹廟

陰陰古殿注脩廊海伯川靈儼在傍一代衣冠埋石甕
千年風雨鎖梅梁碧雲暮合稽山暗紅茭秋開鑑水香
令我免魚繇帝力恨無歌舞奠椒漿

蓬萊閣

雄簷傑檻跨崢嶸席上風雲指顧生千里勝形歸俎豆

七州和氣入簫笙人遊晚岼朱樓遠鳥度晴空碧嶂橫

今夜請看東越分藩星應帶少微明

程公闕次韻半

晚陰晴景旋生湖暖水香春載酒月寒雲白夜聞笙金
鼇破海頭爭並玉鷺排烟陣自橫我是蓬萊東道主倚

欄先占
日初明

別程公闕給事

人物風流推鎮東夕郎持節作元戎樽前倦客劉師命

月下清歌盛小叢裘弊黑貂霜正急書傳黃犬歲將窮

買舟江上辭公去迴首蓬萊夢寐中

程公闕次韻君
家仲父早相從晚

接清談有阿戎曲水暢情林竹茂小山招隱桂枝叢與
時搏擊飛終遠隨處登臨興莫窮人下天來應問得高
名已到
月華中

中秋口號

雲山簷楯接低空公宴初開氣鬱葱照海旌幢秋色裏
激天鼓吹月明中香槽旋滴珠千顆歌扇驚圍玉一叢
二十四橋人望處台星正在廣寒宮

客有傳朝議欲以子瞻使高麗大臣有惜其去者
白罷之作詩以紀其事與荦老同賦

學士風流異域傳幾航雲海使南天不因名動五千里

宣見文高二百年貢外別題求妙札錦中翻樣織新篇

淹留却恨鴛行舊不得飛觴駐蹕前

孫革老作文章異域有知音鴨綠

差池一醉吟穎士聲名動倭國樂天辭筆過鷄林節髦
零落瓊吞雪辯舌縱橫印佩金奉使風流家世事幾隨

浪泊海

東岑



淮海集卷八